



PANGUNA.

Ro katuyoan sa pag himo ku tueon ngará bukón it iba, kondi mag bulig sa gina tinguhà nga ro pag sueát it inakeanón hay mag kasungkâ ag mag kasunantò. Bukon it katuyoan do mag taó it maeapad ag hathat nga mga sueondan sa pag sueát ag pag hambae it mayád ag matadlung ku inakeanón, ay kon daya ro toyuon hay madamue do magin baeayran sa pag paimprenta, tungód nga mahae do bilí makarón ku papel ag iba pa nga gaeamitón.

Sa olihì, kon mag nabâ ro haega ku mga gaeamitón sa imprenta, ag taw-an eang gihapon it kusóg ag kabaskud, hay maw do pag paimprenta ku hilingapson nga tueon-an nga ra ngaean hay "RO MAPIHIT NGA INAKEANON" nga naga daeá it hathat nga mga sueondan ag eagdaan nga maga tuytoy ag maga turò sa pag hambae ag pag sueát it mapihit nga inakeanón, ag maga daeá it mga bisaeáng bag-ong tukod ag mga hambae nga pinangasawa it inakeanón.